

Submisaun husi La’o Hamutuk

ba

Komisaun C no Parlamentu Nasionál

Kona-ba

Proposta Orsamentu Jerál Estadu 2023

17 Outubru 2022

Introdusaun	2
Sustentabilidade	2
La iha valór atu diskute modelu sustentável, se la implementa.	2
Projesaun despeza ba kada programa sei ajuda Deputadu/a foti desizaun..	3
Dependénsia ba petróleu.....	4
Transparénsia no akontabilidade	6
PN nia website la la’o.....	6
Audiénsia públiku – la’ós audiénsia taka ba públiku no jornalista sira.	6
FCLN hamosu konfuzau.	6
Prodús livru iha Tetum, no balun iha Ingles, hanesan iha pasadu.	6
Tempu no notísia ba audiénsia públiku la adekuadu.	6
Prioridade no Estratéjia	7
Presiza aseguara kapasidade atu implementa ho di’ak.....	7
Revee fali alokasaun ba programa ne’ebé la fó benefísiu ba povu.....	8
Rekomendasaun:	9

Introdusaun

Ba dala uluk, La'ó Hamutuk hakarak agradese ba esforsu Governu nian hodi elabora dokumentu no loke diskusaun barak iha prosesu preparasaun ba proposta Orsamentu Jerál Estadu nian ba tinan 2023 no publika dokumentu nesesáriu sira hanesan Pre-Budget Statement ho informasaun kle'an uitoan. Ami apresia katak iha proposta OJE 2023, Governu uza sistema klasifikasaun internasionál -- COFOG -- hanesan Lao Hamutuk sujere iha momentu diskute proposta Lei Enkuadramentu Orsamentál. Ami mós apresia implementasaun sistema orsamentál foun, inklui Lei GOP no orsamentu bazeia ba programa, maske Governu seidauk implementa parte hotu ho kualidade no efikás. Ita hein katak esperiénsia husi síkulu OJE 2023 bele ajuda prosesu orsamentál atu la'ó di'ak liu tan iha futuru.

Maske nune'e, dokumentu esensial sira ne'ebé bele diskute iha oportunidade orsamentál kuaze publika tarde, por ezemplu Relatóriu Anuál ANPM no TimorGap ba tinan 2021. Relatóriu rua ne'e kuaze publika tarde tebes no Deputadu/a no públiku laiha tempu atu lee no komprende hodi uza ba debate durante periodu diskusaun OGE 2023. Ministériu Finansas seidauk publika Relatóriu Anuál 2021 kona-ba Fundu Petrolíferu.

Ami enkoraja Governu no Parlamentu Nasionál atu hadi'ak liu tan sistema transparénsia liu husi funsiona website sira no publika dokumentu esensial no relevante sira atu ajuda koñesimentu públiku inklui sosiedade sivil atu enkoraja partisipasaun no fornese kontribuisaun ne'ebé signifíkante ba prosesu orsamentál sira.

Liu husi submisaun ida ne'e, ami espera bele ajuda Ita-boot sira hodi halo desizaun kona-ba oinsá hadi'ak proposta orsamentu ne'e atu tuir duni nesesidade no urjénsia nasaun no povu Timor-Leste nian.

Sustentabilidade

La iha valór atu diskute modelu sustentável, se la implementa.


Deputadu/a sira iha knaar importante tebes bainhira avalia proposta OJE 2023. Desizaun ne'ebé Ita Boot sira foti, bele fó impaktu maka'as ba ita nia nasaun nia futuru. Durante tinan 2022, realidade situasaun finansas estadu inklui rai-naruk fiskál (*precipício orçamental* ka *fiscal cliff*) hetan rekoñesimentu maka'as liu husi ukun na'in sira no media. La'ó Hamutuk fó ona avizu kona-ba ameasa ida ne'e dezde tinan barak, entaun ami apresia katak ema boot balu realiza ona urjénsia no gravidade ba problema ida ne'e – maske ami prefere katak ami nia alerta mak la loos. Desizaun ne'ebé foti agora bele determina saida mak sei akontese ba futuru. Governu rasik rekoñese se ita kontinua tuir tendénsia despeza agora, iha tinan 2034 sei presiza hamenus despeza ho montante 60%, no iha 2035 sei presiza hamenus ho montante 80%. Ne'e sei fó ameasa sériu tebes ba povu.

Governu elabora senáriu nu. 2 husi *Pre-Budget Statement* iha Pontus 3.120 iha Livru *Relatóriu* proposta OJE 2023. Senáriu ida ne'e hatudu dalan atu prolonga Fundu Petrolíferu to'ó tinan 2045. Se Governu bele konsege prolonga Fundu Petrolíferu, ne'e sei fó oportunidade boot liu mai Timor-Leste atu diversifika ekonomia no evita impaktu maka'as husi krize ne'ebé bele mosu se ita hasoru rai-naruk fiskál (*fiscal cliff*) iha kurtu prazu.

Infelizmente, ami observa katak Governu propoin orsamentu ne'ebé xoke ho modelu sustentável ne'ebé sira apresenta iha *Relatóriu*. Tuir modelu ne'ebé elabora iha *Relatóriu*, despeza presiza tun 3% kada tinan to'ó tinan 2034, hafoin mantén nafatin iha nivel hanesan

ho 2034. Maibé, tuir tabela balun iha livru sira kona-ba OJE, ita hare katak despeza estadu (no levantamentu husi Fundu Petrolíferu) sei sae kada tinan to’o 2027, no laiha informasaun kona-ba tinan sira hafoin 2027. Aléinde ne’e, projesaun ba despeza husi Fundu Infrastrutura la inklui mós -- ne’e hatudu katak Governu laiha kometimentu atu haktuir dalan ka modelu sustentável. Despeza estimativa husi Fundu Infrastrutura ba tinan 2024 mak biliaun \$1.3 (aumenta biliaun \$1.1 husi tinan 2023).

Transferénsia istóriku no planeadu husi Fundu Petrolíferu



Ho nune’e, La’o Hamutuk konsidera katak maske Governu rekoñese, ita nia nasaun hasoru hela perigozu boot liga ho sustentabilidade finansas estadu no rai-naruk fiskál maibé falta atu implementa solusaun. La iha valór ida atu mensiona modelu sustentável se modelu ne’e la implementa. Povu Timor-Leste sei hasoru risku boot bainhira Governu laiha planu ida atu hasoru rai-naruk fiskál.

Projesaun despeza ba kada programa sei ajuda Deputadu/a foti desizaun matenek.

Konsidera kontektu finansas estadu agora, ne’ebé hasoru obstákulu boot, importante katak Deputadu/a no mós públiku bele hatene didi’ak implikasaun kompletu husi programa *multi-anuál* sira. Governu rasik rekoñese katak medida sira husi Lei GOP sei implementa durante tinan balun. Maibé, ho proposta orsamentu estadu ida ne’e ita la hetan informasaun kona-ba kustu kompletu husi kada programa. Só Fundu Infrastrutura de’it mak hatudu kustu estimativa ba futuro.

Aleinde ne’e, projesaun jerál ne’ebé Governu konsege fornese la iha konsisténsia. Ezemplu ida mak katak Figura 6 iha Lei GOP hatudu bareira despeza global. Maske laiha tabela, gráfiku hatudu despeza global iha 2023 maizumenus \$1.6bn – maibé proposta Lei OGE 2023 iha \$2.1bn. Mudansa ne’e hatudu katak limita ba despeza ne’ebé foin lalais ne’e estabese ona iha Lei GOP, Governu prontu muda tuir hakarak. Ho nune’e ami kestiona oinsá mak bele fiar ba kompromisu atu limita despeza iha futuro?


Dependénsia ba petróleu

Fundu Petrolíferu nudár fundu úniku no soberanu ne'ebé transforma husi rezerva mina no gás, Bayu-Undan mak fó reseita boot liu ba Fundu Petrolíferu, ne'ebé kada tinan iha istória Timor nian sai fonte prinsipál ba Orsamentu Jerál Estadu. Kampu Bayu-Undan atinje nian másimu produsaun iha tinan 2011, no iha 2022 tun lalais liu, reseita hahú menus no kampu ida ne'e sei taka produsaun iha fulan Outubru tinan ida ne'e. Entaun sei laiha tan reseita petrolíferu iha tinan ne'e nian rohan, só de'it taxa ba prosesu desmantlementu.

Timor-Leste muda ona husi dependénsia petróleu ba dependénsia investimentu husi Fundu Petróleu.

Agora no ba oin, Timor-Leste sei depende de'it ba kapitál no retornu husi Fundu Petrolíferu atu fornese maioria finansiamentu ba Orsamentu Estadu kada tinan. Fundu Petrolíferu investe iha merkadu finanseiru internasionál, ida ne'ebé fulan hirak ikus ne'e sofre negativu liu biliaun \$2, maske tinan barak iha istória fundu nian investimentu fó retornu total maizumenus biliaun \$8.

Retornu Investimentu Fundu Petrolíferu Akumula ona



Grafiku husi La'o Hamutuk bazeia relatoriu mensal husi Banku Sentral TL nian. Outubru 2022

Dependénsia ba retornu husi FP signifika katak importante tebes Deputadu/a bele komprende didi'ak situasaun ho fundu ne'e no projesaun ba futuro. Seksaun 1.3 husi Aneksu V hatete katak "Asumsaun retornu investimentu ba 2022 mak -7.89% hafoin kontabiliza dezempeñu to'o Juñu" no ida-ne'e uza atu kalkula RSE ba 2023. Infelizmente, senáriu sira kona ba Fundu Petrolíferu kontinua asume retornu 4.1% ba futuro no falta atu konsidera possibilidade ba retornu investimentu negativu ka ki'ik ba futuro. Maske relatóriu kona-ba Fundu Petrolíferu ba fulan Setembru seidauk fahe, ita tenke hatene katak investimentu sira kontinua atu lakon – balansu bainhira Setembru remata mak biliaun \$16.9 – biliaun \$2.7 menus kompara ho inísiu 2022. Retornu investimentu iha Jan-Set 2022 mak negativu 17% (anualizadu).

Ami observa katak risku sira ne'ebé Governu deskreve iha *Relatóriu* kona-ba Sustentabilidade Fiskál, Declaração de Riscos Orçamentais e Passivos Contingentes, no

Aneksu Metodolójiku falta atu deskreve risku ne'ebé bele akontese. Ami husu ba Deputadu/a sira atu lee ho kuidadu dokumentu refere, no husu Governu atu foti asaun atu aseguira katak sira nian planu despeza konsistente ho realidade finanseira Timor-Leste nian.

Maske reseita petróleu no Fundu Petrolíferu finansia programa no atividade Estadu nian durante ne'e, infelizmente, hafoin tinan barak ita la kaer oportunidade atu harii sistema ekonómiku ida ne'ebé produtivu, sustentável no diversifikadu – nune'e bele dezeña no muda diresaun lalais no urjente atu prevene Timor-Leste tama liu tan ba situaun grave. Ida ne'e refleta iha situaun ekonómiku no finansiamentu ne'ebé exesivamente kontinua depende ba importasaun, depende Fundu Petrolíferu no problema estrutural ne'ebé too agora seidauk iha alterasaun signifkante.

Atu hatán ba realidade problematiku ne'ebé temi iha leten, Governu kontinua mehi katak reseita husi indústria estrativa sei ajuda nasaun nia ekonomia ba tempu naruk, no nega atu dezenvolve setór ne'ebé sustentável. Ida ne'e refleta iha prioridade sira ne'ebé Governu atu tuir iha projetu Greater Sunrise, kampu seidauk dezenvolve seluk, atividade petrolíferu sira iha onshore, *Carbon Capture and Storage* (CCS), kontratu foun iha onshore no offshore no atividade mineiru sira. ANPM prezisa halo esforsu liu tan atu kompañia sira tuir rekezitu husi EIS no EMP, infelizmente kompañia sira iha tendénsia ba violasaun comunidade sira nian direitu inklui laiha seriedade ba konsultasaun ne'ebé kle'an no loos, kontráriu uza de'it autoridade seguransa atu ameasa comunidade hanesan socializasaun ba bloku Pualaka iha Natarbora. Maibé projetu sira ne'e (esklui Sunrise) ki'ik la halimar, no maioria projetu peskiza petróleu iha mundu nunca fó retornu, tanba laiha viabilidade komersial. Timor-Leste simu risku boot bainhira ita depende ba fantasia sira ne'e, no la fó prioridade ba diversifikasaun.

Di'ak atu haree katak Governu la tau planu despeza ba tinan ida ne'e atu kontinua auto-estrada, harii refinaria no fábrica petrokimika nudár komponente Tasi Mane. Maibé, kontinua planu atu gasta ba projetu LNG iha Beaçu no baze fornimentu iha Suai - importante katak estudu independente bele finaliza molok kontinua investe iha komponente hirak ne'e. Ami observa iha alokasaun ba programa ida husi MPM atu halo "Estudu de Upstream e Midstream do Regime Greater Sunrise dos Recursos Petroliferos do Mar de Timor", maibé ami sujere atu kria ekipa independente -- konsultan esterna ida -- hodi halo analiza ba projetu Tasi Mane hodi hatene ho kle'an sobre benefísiu, risku no kustu sira husi kada parte no komponente projetu Tasi Mane no Greater Sunrise. Proponente sira tenke fó oportunidade ba Parlamentu Nasionál, sosiedade sivil no parte independente sira atu halo analiza ba estudu sira ne'ebé halo tiha ona no foin iha planu atu halo estudu. Se lae ita gasta saugati de'it rekursu uitoan ne'ebé iha ba projetu inserteza ida ne'e.

Projetu estrativa sira ne'ebé temi iha leten no Governu uza nudár esperansa ba reseita iha futuro, karik projetu CCS no onshore bele fó reseita finanseiru uitoan atu ajuda finansiamentu, maibé asuntu esensial liu mak Timor-Leste tenke hetan forma forte ba harii reziliénsia povu nian no ajuda harii sistema ekonómiku ida ne'ebé diversifikadu no sustentável. Iha realidade, CCS no onshore hotu bele fornese reseita entre zero no tokon \$50 kada tinan, no sei la fornese empregu barak. Setór estrativa capital-intensive tebes, no kada dolar gasta atu subsidiu setór ne'e fó benefísiu (traballadór, subkontratu, fornimentu) menus liu duke besik setór hotu seluk. Husi perspetiva sustentabilidade, prezisa aseguira katak Governu fó prioridade ba atividade ne'ebé bele duni fó reseita ba OJE no benefísiu ba povu ba longu prazu.

Transparénsia no akontabilidade

PN nia website la la'ó.

Prosesu dezenvolvimentu OJE mak hanesan prosesu importante tebes, no presiza duni aseguira katak prosesu la'ó ho transparénsia. Parlamentu Nasionál nia website <https://www.parlamento.tl/> agora daudaun ne'e la funsiona atu fahe buat ida, inklui agenda, atividade no dokumentu importante sira ba públuku, nudár representante povu iha responsabilidade atu fahe informasaun importante sira ba povu ne'ebé sira representa ba. Ami nota ikus-ikus ne'e Parlamentu Nasionál tenta atu minimiza informasaun ba públuku, hamenus partisipasaun públuku no transparénsia. Tuir loloos representante povu tenke nakloke hodi hetan sujestaun, kritika, no apoiu moral hodi aseguira knar parlamentu la'ó ho efikás no efisiénsia.

Audiénsia públuku – la'ós audiénsia taka ba públuku no jornalista sira.

Ami nota audiénsia 'públuku' sira durante ne'e taka ba públuku, saida mak akontese katak komisaun permanente especializadu PN nian, konvida órgaun kompetente sira hodi rona perspetiva oioin husi audiente sira maibé la fó espasu ba jornalista ka públuku atu akompañã prosesu audiénsia ne'e. Nudár espasu atu hakbiit informasaun ba jornalista hodi fahe tutan ba públuku em jerál. Ami hanoin atu aseguira transparénsia no partisipasaun públuku audiénsia sira hanesan ho sociedade sivíl, akadémiku, no ajénsia internasionál sira presiza loke ba públuku.

FCLN hamosu konfuzau.

Ministériu Finansa presiza halo klarifikasaun ba públuku atu labele hamosu konfuzau iha públuku, bainhira Governu kontinua dehan proposta OJE 2023 mak biliaun \$3.155. FCLN gasta ona liu OR iha tinan 2022, no governu la husu osan tan iha 2023. Entaun proposta despeza loos iha 2023 mak biliaun \$2.155.

Tuir mai, ami enkoraja Deputadu/a sira atu husu Governu klarifika tanba sá proposta OJE 2023 nafatin aloka tokon \$116 ba pensaun veteranu, maske estabelese ona FCLN? FCLN se komesa selu kustu pensaun ne'e iha tinan hira? Ami mós kestiona tanba sá mak pensaun ne'e tama iha programa Igualdade Jéneru no Inkluzau Sosiál.

Prodús livru iha Tetum, no balun iha Ingles, hanesan iha pasadu.

Iha tinan pasadu Governu prodús livru balun iha Tetun no balun iha Ingles, realidade iha tinan ne'e livru sira kuaze hotu iha Portugés. Livru tolu fornese mós iha Ingles, maibé só dokumentu rua de'it mak fornese iha Tetun. Ami enkoraja Governu atu kontinua iha tradusaun ba lian Tetun no Ingles nune'e Deputadu/a hotu, peskizadór, jornalista no públuku sira bele asesu.

Tempu no notisia ba audiénsia públuku la adekuadu.

Ami triste tebes bainhira Komisaun sira iha PN la konsidera sociedade sivíl hanesan parte importante atu ajuda PN ho informasaun, analiza no perspetiva povu nian. La'ó Hamutuk no sociedade sivíl seluk la hetan konvite atu fó testemuña iha audiénsia ne'ebé Komisaun C PN. ami enkoraja atu PN bele hadi'ak liu tan espasu ba ami no públuku hodi fornese analiza no hariku liu tan idea antes debate ho Governu.


Prioridade no Estratégia

Presiza asegura kapasidade atu implementa ho di'ak.

Governu hakerek katak prinsipiu OJE mak “kualidade programa importante liu duke kuantidade programa”. Em prinsipiu ne’e di’ak tebes, maibé realidade katak medida hamutuk 275 (programa 44) ne’e barak - bazeia ba kapasidade iha pasadu Governu la konsege ho disciplina atu implementa planu tuir tempu no hatudu rezultadu. Tinan oin sei iha eleisaun jerál no membru Governu no téknika barak sei ba halo kampaña polítika. Situasaun ne’e sei aumenta obstákulu tan ba ezekeusaun no implementasaun programa ho kualidade. Di’ak liu fó prioridade ba programa ne’ebé realistíku tuir kbiit no rekursu umanu ne’ebé iha atu garante duni ezekeusaun no kualidade. Ho nune’e bele realiza programa hodi responde ba populasaun tomak sira nia halerik ba ai-han, bee mós, infraestrutura báziku, kanál irrigasaun eskalaun ki’ik ba nivel suku to aldeia sira, promove indústrria ki’ik transformadóra produutu agríkolá, kooperativa, edukasaun, saúde no setór importante ne’ebé bele ajuda povu nia moris no ekonomia.

Alokasaun ba programa iha proposta OJE 2023 (tokon \$ EUA)

FCLN no programa sira menus tokon \$2 la inklui.



Grafika husi La'o Hamutuk bazeia ba proposta Lei OJE ba 2023. Outubru 2022

Nudár ezemplu, ita bele hare iha parte setór agrikultura ninia programa no orsamentu husi tinan 2021 no 2022, hanesan hatudu iha tabela:

MAP		2021	2022	2023
Programa boot		5	2	2
Sub programa		17	11	16
Atividade		63	44	63
Funionáriu		1.153	1.441	1.441

Parlamentu Nasionál, nudár órgaun lejizlativu ne'ebé sempre ba halo fiskalizaun ba ezekeusaun orsamentu no programa sira, ami enkoraja atu halo fiskalizaun loloos no ba hasoru comunidade benefisiáriu sira hodi klarifika implementasaun programa hirak ne'e akontese duni ka lae inklui saida mak comunidade sira hanoin no sente liga ho programa hirak ne'e, nudár evidénsia hodi sukat qualidade no rezultadu ezekeusaun orsamentu.


Tuir mai, Parlamentu uza ninian kompeténsia hodi ezije ba Governu no Ministériu relevante sira) tenke halo avaliasaun didi'ak ba implementasaun programa anuál kada Ministériu nian hodi hatene rezultadu husi programa ne'ebé sira hala'o inklui buka hatene saida mak falla no oinsá atu hadi'ak iha programa tinan fiskál tuir mai inklui oinsá bele responde ba dezafiu sira. Estratéjia hirak ne'e bele hamosu koordenasaun, efikás no fasilita Membru Parlamentu sira diskute no aprova planu orsamentu no programa foun tinan tuir mai hodi responde duni ba situasaun atuál iha Timor-Leste.

La'o Hamutuk mós apresia katak iha diskursu no dokumentu ofisiál sira Governu nian rekoñese problema estrutural sira povu nian, inklui insufisiénsia ai han, malnutrisaun, dependénsia ba importasaun, dezempregu no kiak. Maibé proposta OJE ba 2023, dala ida tan Timor-Leste la kaer oportunidade husi aspetu polítika orsamentál ba ajuda redús problema sira. Realmente, ami la haree estratéjia atu aumenta produsaun iha produktu, foos, batar no ai han sira seluk atu redús insufisiénsia ai han no hadi'ak malnutrisaun.

Revee fali alokasaun ba programa ne'ebé la fó benefisiu ba povu

Iha Governu nia diskursu públiku no dokumentu narrativa sira dala barak afirma, prioridade hotu Governu nian mak konsentra ba ema, maibé alokasaun ba setór sira ne'ebé liga direktamente ba dezvoltamentu rekursu umanu (edukasaun, saúde, bee mós no agrikultura) nian iha de'it 16%. Nune'e, ami enkoraja atu Deputadu/a sira bele lori asuntu ida ne'e diskute kle'an liu tan ho Governu durante debate orsamentu iha Plenária PN. Tuir mai, hanesan ami deskreve iha seksaun iha leten kona-ba dependénsia ba petróleu, setór estrativa iha karakterístika *capital-intensive* tebes, signifika katak benefisiu ba povu menus liu kompara ho setór seluk.

Agora ho sistema orsamentu bazeia ba programa, Governu iha objetivu atu tetu di'ak liu rezultadu husi programa sira. Tuir prinsípiu ida ne'e, ami haree katak Governu tenke revee fali alokasaun ba empreza públiku sira ne'ebé forma hodi kontribui reseita ba estadu maibé infelizmente la konsege no kontinua fó todan ba despeza estadu kada tinan. Nudár ezemplu ida, ita bele haree katak TimorGAP, E.P. ne'ebé falta atu uza alokasaun ne'ebé sira simu, maibé husu osan tan la ho evidénsia benefísiu hanesan gráfiku tuir mai hatudu.



Ami enkoraja Deputadu/a atu kestiona alokasaun ne'ebé la iha evidénsia kona ba kapasidade atu implementa, ka benefísiu ba povu. Alokasaun rekorrente balun seidauk iha evidénsia kona ba benefísiu. Ami husu Governu atu la bele aumenta de'it programa foun, maibé avalia benefísiu no nesesidade programa no alokasaun rekorrente sira.

Rekomendasaun:

1. Governu presiza fornese sira nia planu loloos liga ho sustentabilidade finansas, no fahe ho PN no públiku hodi bele konsidera proposta OJE ida ne'e ho informasaun kompletu.
2. Governu presiza fornese kustu despeza estimativa ba kada programa ba tinan haat tuir mai, hodi PN no públiku bele konsidera no avalia proposta alokasaun bazeia ba kustu tomak.
3. Ami husu Deputadu/a sira atu ezije Governu atu la bele ignora situasaun grave rai-naruk fiskál, no foti asaun apropriadu atu implementa planu sustentável no aseguara katak planu despeza haktuir realidade finansas estadu.
4. Husu Deputadu/a atu avalia proposta alokasaun ba setór petróleu ho hanoin katak setór ida ne'e se la resolve problema sira ne'ebé ita hasoru hela no sei falta atu lori benefísiu ba povu. Kansela alokasaun ne'ebé se la ajuda povu atu atinje moris di'ak, no alokasaun ba projetu boot sira ne'ebé seidauk iha evidénsia forte kona ba benefísiu, kustu, no risku.
5. Governu presiza implementa pratika di'ak liga ho prinsípiu transparénsia.

6. Husu ba Deputadu/a sira atu avalia proposta alokasaun husi perspetiva sustentabilidade, kapasidade, no benefísiu ba povu.
7. Parlamentu Nasionál presiza hadi'ak prosesu audiénsia públiku ka mekanizmu seluk atu simu informasaun no analiza husi sosiedade sivil.

Ami husi La'ó Hamutuk sempre prontu atu oferese ami nia kontribuisaun analítiku hodi ajuda distintu Deputadu/a sira hodi halo diskusaun kle'an liu tan ba proposta Lei OJE 2023 molok halo aprovasaun final global iha Parlamentu Nasionál.

Obrigadu wa'in ba Ita-boot sira hotu nia atensaun no konsiderasaun tomak.

Ami be saran lia,



Celestino Gusmão

 . Charles Scheiner

Bree Ahrens

Charles Scheiner



Marta da Silva



Mariano Ferreira



Jonathan Gonsalves



Elizabeth da Silva



Elizaria Febe Gomes